

高等學校

秋季始業

第一冊

第一冊

共和國

教科書

新歷史教授法

上海商務印書館出版

民國二年六月

編纂者 趙玉林

校訂者 傅運林

秋季始業 新歷史 (高等小學校用)

●遵照新章編輯 ●三學期適用

學期	第一學期	第二學期	第三學期
學	八月十一日 至九月五日	一月三十一日 至二月十五日	四月三十一日 至五月十五日
時數	第一第三第五 各冊各分二十 六時足供第一 學期之用	第二第四第六 各冊各分三十 四時足供第二 學期之用	第三學期之用
定時	三	學	時

海圖書

索書號碼

登記號碼 477301

秋季始業 新歷史教授法編輯大意

一本編供秋季始業高等小學教授歷史之用、與春季始業共和國教科書新歷史相輔而行、全編六冊、足供三學年之用、

一本編體裁、略分三項、首列準備、如地圖歷史圖人物圖之類、(書中之插圖須解釋者亦表明之) 及問答發端、次教授事項、分之爲二、甲時間分配、乙內容提示、

次參考、將課中之名物訓詁、及事實原委、羅列之以備教員臨時採用、

一本編依據教育部公布之教育宗旨、注重道德教育、輔以實利教育、軍國民教育、更以美感教育、完成其道、德故於準備內所設之圖畫之品物之問答、類以啓發此數種觀念爲必要內容提示、亦如之、

一圖畫及品物、小學校之置備者、恐未能一時滿足、故本編對於圖畫、對於品物、皆付小學校內普通易備之件、俾作準備、以免臨時束手、

一今古互證、前後對勘、爲歷史上必需之知識、本編於準備內、設爲問答、或舉前課前數課事件、以爲汲引之端、或卽近時民國現狀及校內現狀、以開觸發之緒、要

使兒童有抽繹之興趣。
一時間之分配、本編以篇幅之長短、及參考之繁簡、略爲區劃、教授時儘可酌量增減、總以不背授課之額定時間爲主。
一提示語不患簡、常患繁、不患淺、常患深、第簡恐不明、淺恐不顯、本編力矯是弊、總期兒童受歷史之益、不蒙歷史之困。
一史事至蹟、旁徵曲引、非兒童所宜、本編參考、多撮舉大要、不爲鋪張、艱深之理、以淺近釋之、繁重之事、以簡單括之、間有關涉地名人名、因類而注入者、原備教師之參閱、非必求學生之記憶也。

目次

第一	太古
第二	黃帝
第三	堯舜
第四	湯武
第五	周室東遷
第六	齊桓公
第七	越王句踐
第八	孔子
第九	老子
第十	戰國七雄
第十一	孟子
第十二	秦始皇

授課時數

二
二
二
二
二
二
二
二
二
二
二
二

第十三 漢高祖

二

第十四 漢武帝

二

第十五 張騫

二

時間分配方法附

每篇教授二時者，其分配方法，可分三種：（甲）每篇平分二段，每時教授一段；（乙）每篇分二段，第一段較多，第二段較少，第一時教授第一段，第二時教授第二段，並複習全篇；（丙）不分段落，第一時教授，第二時複習，其每篇教授三時以上者，以此類推。（如三時者可分二三段，四時者可分三四段，或竟不分段落，視各篇內容而定）

共和國新歷史教授法第二

第一 太古

本文

太古之時，中國爲苗族所居，其後有自西方來者，遷居中國，文化日興，後世稱其種類曰華，是卽今之漢族也，稱中國曰中華，亦因於此。當文化未開之時，人皆穴居野處，茹毛飲血，衣蔽前而不蔽後，又無文字，結繩以記事，大事作大結，小事作小結。有巢氏始教民構木爲巢，以避蛇蟲猛獸之害，燧人氏鑽木取火，教民熟食，伏羲氏教民佃漁畜牧，造書契，定嫁娶，神農氏作耒耜以教耕，嘗百草以療疾，立市廛以便交易，人民之幸福漸備矣。



一 標中華民國國旗一，指示學生，表明中華二字之由來，藉以激起其愛國之觀念。

二 懸人種圖一，表明若爲華種，若爲苗種，及其生活之狀態。

三 懸歷代統系圖一，指明圖中之第一位黃帝，已距今四千六百餘年，而本課

之有巢燧人伏羲神農，又遠在黃帝以上，足見我國爲世界上之文明先進國，
教授事項

(甲) 時間分配 本課分二時

第一時 太古之時至亦因於此

第二時 當文化未開之時至人民之幸福漸備矣

(乙) 內容提示

一 本課爲全書開始，提示一節，不能局於本課之範圍，當將歷史之意義，國民所以必需歷史之理由，爲之詮釋大要。

二 將初等國文中之涉及史事者，略加問答，告以中國由古及今，名人要事，至繁至賾，非汝曹所讀之國文課本內，所能賅備，故不得不與汝曹講歷史，汝曹對於國文內之名人要事，既得可喜可感之興味矣，盍再求之歷史，一暢其興而博其味乎。

三 告以歷史之順序，當先古後今，如人生然，有胚胎時代，然後有幼稚時代，發

育時代，長成時代，太古者，歷史之所自胚胎也，故本書先與汝曹講太古。

四 苗人原爲中土主人，以文化不及華人故，故華人起而代之，華人有完全美滿之數千年歷史，足以代表全國，汝曹欲使吾國國旗，揚威世界，不可不促進其文化，欲促進其文化，不可不寶貴其完全美滿之數千年歷史。

五 將太古人民衣食住三種不完美之困難，無文字之困難，無醫藥之困難，詳細指陳，以見文化之不可不急求前進。

六 歷陳古人之種種造福人民，以古人受種種困難，而能改良進化，去苦得甘，世界上改良無已時，進化亦無已時，故望汝曹無忘古人，無忘歷史，（本課爲歷史第一課，故提示語多趨歷史一方面，非故爲蔓衍也）

參考

〔太古〕古爲過去時代之通稱，太古，時代久遠之稱也。

〔苗族〕卽人種學所稱馬來種也，是族之居中國也，在漢族先，或謂卽神州土著。

〔漢族〕係有漢時代，對於四方各異族之名稱，然漢本朝名，非族名也，左傳戎子。

支駒言我諸戎飲食衣服不與華同以戎對華確係種別合爲定名我國改建共和正名爲中華民國義亦本此惟對於滿蒙回藏及苗族諸同胞習慣上仍通稱爲漢族云

〔漢族西來說〕經多數人種學家所考驗均稱漢族來自西土由帕米爾高原循崑崙山脈東遷達於黃河兩岸漸次普遍全國

〔有巢氏〕人之生也爪牙角毒概不足以勝禽獸故有巢氏教之巢居一稱大巢氏大其功也是爲古帝之一

〔燧人氏〕亦古帝也燧爲取火之具因其事而表其功故曰燧人氏一作遂人以其烹飪熟食能遂民之生也

〔鑽木取火之物理〕木與鑽因摩擦而生劇熱達於發火點則燃燒

〔伏羲氏〕風姓都陳（今河南陳州）始結網罟以教佃漁爲漁獵社會之改良家故曰伏羲養犧牲以充庖廚由漁獵社會進游牧社會故又曰庖羲氏

〔書契〕刻木爲記號以代結繩之用爲文字所自起後至黃帝時倉頡始造文字

〔嫁娶〕古時民知有母不知有父伏羲始制嫁娶以儷（偶數）皮爲禮正姓氏通媒妁以重人倫之本

〔神農氏〕姜姓都曲阜（今山東曲阜縣）斲木爲耜揉木爲耒教民藝五穀而農事興由游牧社會進耕稼社會故稱神農在位百四十年傳八世

〔耒耜〕卽今之犁柄之曲木謂之耒耒端之刃謂之耜耜用以起土神農氏斲木爲之蓋金屬功用爾時尙未發達也

〔嘗百草〕嘗其滋味察其寒溫平熱之性作方書以療民疾醫學之權輿也

〔市廛〕市邸爲廛列廛於國中爲市爲商業所自始

第二 黃帝

本文


神農氏之末世有蚩尤者好用兵作刀戟大弩與神農氏爭黃帝起師殺蚩尤遂代神農統一中國黃帝之制作尤美備於前創甲子算數定律度量衡制衣冠鑄貨幣作宮室造舟車民皆安樂黃帝安撫四方未嘗寧居東至於海西至於崆峒山名在甘肅南至於大江大會諸侯於釜山在直隸諸侯莫不親附黃帝

之妃名嫫祖，始教民育蠶，中國至今享其利。

準備

一 照畫黃帝疆域圖，俾與書中圖相比照，隨如下講明「黃帝疆域圖解」繪地圖通例，皆以上爲北，以下爲南，以右爲東，以左爲西。本圖北邊一帶山脈，爲崑崙山東迤之北支，其山系縣互於黃河以北，大漠與黑龍江以南，釜山在今直隸保安州西南，崆峒在今

黃 帝 疆 域 圖



甘肅高臺縣西南，皆此山系所經也，中爲崑崙中支，其山系縣互於黃河以南，大江以北，其中支以南，縣延於西南及東南之山脈，爲崑崙南支，皆在大江以南，圖中北部河道即黃河，南部河道及大江。

二 懸黃帝像一、

三 畫刀戟弩各一、

四 手蠶繭數枚，以備指示、

教授事項

(甲) 時間分配 本課分二時、

第一時 神農氏之末世至民皆安樂

第二時 黃帝安撫四方至中國至今享其利

(乙) 內容提示

一 於刀戟大弩，見兵器原始，表明製造學之不可不講求、

二 於黃帝禽殺蚩尤，見尙武精神之作用，於種種制作，見文明當於物質上研

求、於安撫四方、見黃帝開國之功、甚爲偉大、吾人宜熱心崇效之、

三 於蠶桑發明、利被萬世、見實業爲生人大本、引起學生尊崇實業之觀念、

參考

〔神農末世〕帝榆罔、神農八世孫也、襲神農之號、故亦曰神農氏、在位五十五年、遷居涿鹿、(山名在直隸保安州)黃帝時降封之於潞、(今直隸通州)

〔蚩尤〕九黎之君、苗族酋長也、好兵喜亂、暴虐天下、兼并諸侯、攻榆罔、與黃帝戰於涿鹿之野、帝擒而戮之、

〔黃帝〕姬姓、名曰軒轅、國於有熊、(今河南新鄭縣)以涿鹿之戰、諸侯尊爲天子、在位百年、

〔刀戟弩〕刀、有刃之兵也、戟、有枝兵也、弩、弓之有臂者、亦謂之窩弓、設爲機巧、鉤弦發矢、力強可以及遠、

〔甲子〕大撓所作、甲、乙、丙、丁、戊、己、庚、辛、壬、癸、謂之天干、干者幹也、子、丑、寅、卯、辰、巳、午、未、申、酉、戌、亥、謂之地支、支者枝也、枝幹相配以記日、

〔算數〕隸首所定、卽九章算法、律、度、量、衡、由是成焉、

〔律度量衡〕律爲伶倫所作、伶倫取竹於嶰谿之谷、斷兩節間而吹之、制十二笛以象十二律、黃鍾、太簇、姑洗、蕤賓、夷則、無射、爲陽、是爲六律、大呂、應鍾、南呂、林鍾、仲呂、夾鍾、爲陰、是爲六呂、大約以笛之長短、爲等差、度以度長短、如丈、尺寸分之類、量以量多寡、如斗、石、升、合之類、衡以衡輕重、如斤、兩、錢、釐之類、

〔衣冠〕帝作冕、垂旒、(以絲繩綴玉於冕之前後爲旒、取目不視邪色之義)充纁、(纁綿也、充充耳也以纁充耳、取耳不聽讒言之義)爲玄衣黃裳、以象天地之色、〔貨幣〕范金爲貨、制金刀、(錢名也)立五幣、(金、刀、泉、布、帛)以制國用、

〔宮室〕木處而顛、故上棟下宇、以爲宮室、帝嘗廣宮室之制、而作合宮、以爲祀享敷政之所、

〔舟車〕共鼓化狐、剡木爲舟、剡木爲楫、以濟不通、邑夷作車、以行四方、服牛乘馬、備物致用、而天下利、

〔未嘗寧居〕帝方行天下、拔山通道、遷徙往來、以師兵爲營衛、故無寧居、締造之

勤於斯可見。

〔大江〕即我國第一巨川揚子江也，其流域故爲苗族所居，帝時以黃河流域爲根據地，漸次擴張至揚子江流域。

〔嫫祖〕帝之元妃，西陵氏之女也，治絲繭以供衣服，而天下無皴瘡（音遼祝寒瘍也）之患，後世祀爲先蠶。

第二 堯舜

本文 帝堯者，黃帝之元孫也，年十六爲天子，聰明仁儉，所居茅茨土階，所食菜羹土器，一民饑，曰：「我饑之。」一民寒，曰：「我寒之。」一民有罪，曰：「我陷之。」故民愛之如父母。晚年，以舜賢，禪以帝位。舜使禹治洪水，禹勞身焦思，居外十三年，三過其門而不入，洪水遂平，民得安居，當是時，中國之地，較黃帝時尤廣，如東三省、朝鮮、內蒙古，皆入中國之版圖，苗族亦感舜之文德，全族歸服，後世稱堯舜之時，爲中國郅治之世。舜禪位於禹，禹不稱帝而稱王，國號夏，禹卒，國人立其子爲王，堯舜二君，皆誠意愛民，不以君位自私，讓國於賢者，至禹以後，天子復爲一姓所世襲。

準備

一 畫黃帝至堯世系圖如左。

黃帝——帝少昊——橋極——帝嚳

帝嚳（荒淫爲諸侯所廢）
帝堯（爲諸侯所尊即帝位）

二 畫黃帝至舜世系圖如左。

黃帝——昌意——帝顓頊——窮蟬——敬康——旬望——橋牛——瞽叟——帝舜

三 黃帝至禹世系圖如左。

黃帝——昌意——帝顓頊——鯀——夏王禹

四 畫堯舜時疆域圖，以黃帝時地域比較之，令知堯舜時國土加廣。

教授事項

（甲）時間分配 本課分二時

第一時 帝堯者至爲中國郅治之世

第二時 舜禪位於禹至天子復爲一姓所世襲

(乙) 內容提示

- 一 於茅茨土階、我饑我寒、以位禪舜等、見堯之真能爲國民服務、有義務思想、可爲愛國家者之標準、
- 二 於舜之以文德化苗、禹之三過門不入、舜禪禹、禹子之立非禹意等、見舜禹均誠愛國家、均可爲標準、
- 三 於東三省、朝鮮、內蒙古、之皆入版圖、苗之全族歸化、見各族自古便爲一家、其團結力在四千年前已然、
- 四 於禹後之君位世襲、見中國文化滯進之原因、

參考

〔帝堯〕姬姓、名曰放勳、年十三、佐帝摯、受封於陶、（今山東定陶縣）又封於唐、（今直隸唐縣）故爲陶唐氏、都平陽、（今山西臨汾縣）在位一百年、

〔玄孫〕子之子爲孫、孫之子爲曾孫、曾孫之子爲玄孫、玄言親屬漸微也、

〔天子〕人受天地之氣以生、故天爲父、地爲母、凡生於天地間者、無一非天之子

也、君主時代、以君主爲全國代表、因以天子爲君主之專稱、

〔茅茨〕以茅覆屋謂之茨、

〔土器〕當時陶器學已發明、土器、合土而成之器也、如今碗盞之屬、

〔陷〕設罪以掩禽獸謂之陷、人人於罪、亦謂之陷、

〔帝舜〕姚姓、名曰重華、年二十、以孝聞、耕於歷山、（在山西永濟縣）人皆讓畔、漁於雷澤、（在歷山下）人皆讓居、陶於河濱、器不苦窳、（蟲惡謂之苦不堅緻謂之窳）三十登用、使治百官、百官皆治、代堯攝位、卒受禪、即帝位、在位四十八年、都蒲坂、（今山西永濟縣）國號虞、

〔禪〕傳與也、

〔夏禹〕姒姓、名曰文命、以治水有功封於夏、（今河南禹州）受舜禪、即王位、在位八年、傳十六王、四百三十九年、都安邑、（今山西夏縣）

〔東三省〕古營州及幽州域內、遼河以東屬營州、以西屬幽州、

〔朝鮮〕古營州東境、

〔內蒙古〕古幽州并州雍州之北境、（幽并營三州皆舜所增舜分冀之東爲并州東北爲幽州青之東北爲營州至禹時復舊）

〔苗族歸服〕舜以苗弗率化、命禹徂征、苗民逆命、舜乃大布文德以招來之、有苗格、格者、不勞兵力而自至也、是爲苗人同化之始、

〔堯舜爲鄧治之世〕鄧、至也、堯舜爲國民謀幸福、不私大位、與近世共和政體相彷彿、爲政治史上最速之進化、故稱爲鄧治、

〔帝王〕德合天者稱帝、天下所歸往者爲王、一從天道言、一從人事言、皆君主之名號也、

〔天子世襲〕以行政最高位置、爲家傳私產、最爲君主時代之大弊、

第四 湯武

本文 天子世襲、驕虐之主、時爲民害、於是有革命之舉、其事始於商湯、湯爲夏之諸侯、夏王桀無道、人民怨恨、湯率師伐桀、逐去之、衆推湯爲天子、國號商、傳至於紂、亦無道、嬖妲己、又作炮烙之刑、以威百姓、時周文王爲商之諸侯、仁義愛

民、民皆歸之、三分天下有其

二、文王卒、子武王立、以太公

爲將、起兵誅紂、代爲天子、都

於鎬、是爲西周、武王卒、子

成王立、年幼、其叔父周公攝

政、制禮作樂、爲周室最盛之

世、越裳氏來朝、周公賜以指

南車、使者乘之歸國、

準備

- 一 寫夏桀乘人圖五字於黑板、隨如下講明、〔乘人圖解〕漢時武氏石室畫像、用以垂戒人世者、桀以人爲車、坐二人肩背、此亦大違人道之舉也、
- 二 設問我國紀元前一年、爲何武昌有起義之民兵、（答）政治革命、
- 三 問爲何革命、（答）爲民除害、



- 四 誰爲民害、(答) 專制之君主、
- 五 指統系圖上之湯武、表明其爲中國最初最榮譽之革命家、
- 六 畫今用之指南針於黑板、或即用羅盤、表明指南車實爲其導線、
- 教授事項

(甲) 時間分配 本課分二時

第一時 天子世襲至是爲西周

第二時 武王卒至使者乘之歸國

(乙) 內容提示

- 一 湯武革命、純以國利民福爲前提、非爲權利、
- 二 驕虐爲專制時代之慣例、故君主政體、當永永不使再見於中華、
- 三 有指南車、卽不慮道里之遠、方向之歧、足見物理學之有造於世界、
- 參考

〔革命〕命爲天命、古之君主、自以爲受天命而爲天子、然肆行驕虐、天必厭之、於

是臣民順天意以革除之、謂之革命、

〔商湯〕子姓、舜司徒契之後、契爲帝嚳子、源出黃帝、受封於商、(今陝西商州) 湯爲天子、因以爲國號、都亳、(今河南偃師縣) 在位三十年、傳二十七王、六百四十四年、

〔夏桀〕能伸鉤索鐵、生裂兕虎、負恃其勇、不務德而武傷百姓、淫虐貪狠、百姓弗堪、爲湯所逐、奔南巢、(今安徽巢縣)

〔衆推〕湯歸自克夏、諸侯咸推爲天子、湯再拜而讓者三、乃卽位、

〔紂〕性汰侈、好酒色、驕虐之罪、浮於桀、爲周武王所誅、

〔妲己〕紂得有蘇氏之美女妲己、嬖之、惟其言是聽、

〔炮烙之刑〕爲銅柱、以膏塗之、加於熱炭之上、使有罪者緣焉、輒墮炭中、紂與妲己相爲笑樂、名曰炮烙、極慘之非刑也、

〔周文王〕姬姓、名昌、舜后稷棄之後、棄、帝嚳子、傳至古公亶父、國號周、(今陝西岐山縣) 亶父孫卽文王、有聖德、嘗獻地於紂、請除炮烙之刑、

「三分天下有其二」時中國九州，荆梁雍豫徐揚六州屬文王，惟青冀兗三州屬紂。

「武王」名發，文王子，伐紂時，不期而會者八百國，戰於牧野（今河南淇縣），紂兵反戈自攻，遂誅紂，即王位，在位十九年，傳三十六王，八百六十七年。

「太公」姜姓，名尚，文王得之於渭水之陽，年七十餘矣，與語大悅，立爲師，武王尊爲師尚父，爲古代兵學大家。

「鎬」在今陝西西安府治。

「西周」武王既遷都於鎬，成王時又承武王之志，營都於洛（今河南河南縣），是爲東都，迨後東遷，因以都鎬時期爲西周時代。

「成王」名誦，武王子，在位三十七年。

「周公」名旦，文王子，武王弟，多材多藝，有周制作，多出其手，爲古代政治大家。

「越裳氏」帝堯時嘗來朝，獻白雉，至是又來朝，獻白雉，周公致薦於宗廟，是爲安南民族歸化我國之古初歷史。

「指南車」越裳使者，迷其歸路，周公賜駟車五乘，皆爲指南之制，使者載之，期年而至其國。

「指南車之物理」指南車爲黃帝所作，以示四方，蓋於車上用子午盤針，以定南北也，針以磁石（即吸鐵石）爲之，磁石之性，分正負兩極，其正磁極常指北，負磁極常指南（地球之南北二極，爲一大磁石，南爲正磁極，北爲負磁極，卻與磁石之磁極相反，異性相吸，故成爲一定之方向），故得用以定方向（磁學理甚深，本課祇言其大概，亦無庸爲學生細述也，閱者酌之）。

第五 周室東遷

本文 成王數傳而至厲王，暴虐無道，國人謗王，王怒，得衛巫（衛國之巫）使監謗者，以告，則殺之，國人羣起逐王，王出走，國內無君，周定公、召穆公共理國政，號曰共和，事在民國紀元前二千七百五十二年，其後立厲王之子宣王，王勤於政事，周室中興，宣王卒，子幽王立，寵褒姒，褒姒不好笑，王舉烽，諸侯疑有寇，爭率兵至，至而無寇，褒姒乃大笑，未幾，犬戎攻王，王復舉烽，兵莫至，犬戎遂殺王，據西

周之地、幽王之子平王即位、王畏犬戎、東遷於洛、(在河南)是爲東周、
準備

- 一 寫共和萬歲四大字於黑板、
 - 二 設問此四字適用於何國、答適用於我中華民國、
 - 三 問何以故、答以我中華民國行共和政治故、
 - 四 行共和政治自何年始、答自民國元年始、
 - 五 問民國前數千年、曾放一共和異彩、彷彿爲今日寫照、汝曹知之乎、
- 教授事項

(甲) 時間分配 本課一時授完、

(乙) 內容提示、

- 一 於監謗見逐、示以言論權之不可侵犯、
- 二 於周召共和、示以此僅爲貴族共和、且爲暫時者、非若今日民國、合全國國民爲一大共和、且爲永久者也、

參考

三 於舉烽失信、遂致見殺、示以信爲立國立身之要素、

〔厲王〕名胡、成王八世孫、居位之三十七年、見逐奔彘、(今山西霍縣)五十一年卒、

〔周定公〕周公之後、爲王卿士、

〔召穆公〕周同姓召公奭之後、亦爲王卿士、

〔宣王〕名靖、在位四十六年、內修政事、外復文武之境土、

〔幽王〕名宮涅、在位十一年、

〔褒姒〕褒國名、(今陝西褒城縣)獻女於王、是爲褒姒、王愛而納之、廢申后、以褒姒爲后、廢太子宜臼、以褒姒所生子伯服爲太子、

〔烽〕烽火也、古人戍守、見敵則舉火爲號、使遠望可見、以備敵也、

〔犬戎〕卽人種學所稱土耳其族也、古之獯鬻、後之匈奴、皆屬此族、

〔平王〕名宜臼、爲東周時代第一王、在位五十一年、

〔東周〕對於西周鎬京言，史家因以東遷後爲東周時代。

第六 齊桓公

本文 周室東遷以後，謂之春秋之世，王室無權，諸侯之強大者，以尊奉王室爲名，命令諸侯，使之從己，世稱爲霸者，而齊桓公爲最盛。齊桓公者，太公之後也，兄弟爭國，管仲助桓公之弟，射中桓公帶鉤，桓公既即位，不念舊仇，以管仲爲相，任以國政，齊遂富強，於是大會諸侯，北伐山戎，南征楚，諸侯爲強大所侵者，則救之，故諸侯皆感其德。齊桓公卒，晉文公繼爲霸者，大破楚師，自是以後，晉楚之勢常相敵，諸侯不屬於晉，卽屬於楚。

準備

一 畫春秋疆域圖於黑板，隨講如下，〔春秋疆域圖解〕如圖，東爲大海，濱海爲齊，齊以南爲魯，北爲燕，又北爲山戎，燕之西爲晉，晉之南爲周，其洛邑卽周都，周東爲秦，均在黃河南北，及大江以北，與齊同濱海者，爲吳爲越，吳之西爲楚，均在大江以南，或兼跨大江之南北，各有虛線以界之。

二 問現在中華民國，財力


不足，將如之何，必曰當使之富，兵力不足，將如之何，必曰當使之強，然則爲汝曹述一能富國強國之古代英雄，汝曹願聞之乎。

三 問中華民國，欲稱雄於

世界，將如之何，必曰握世界上霸權，然則爲汝曹述我國數千年前之霸主，汝曹願聞之乎。

四 因大書富字，強字，霸字，於黑板，令學生注意。

春秋疆域圖



五 敘桓文拒楚事，以今日外國對於我國之事爲證佐，引起兒童尚武之心，
教授事項

(甲) 時間分配 本課分二時，

第一時 周室東遷以後至故諸侯皆感其德

第二時 齊桓公卒至即屬於楚

(乙) 內容提示

一 於桓公之釋仇及管仲之相齊，遂奏富強之效，見兩人均知國家之爲重，故不媿爲英雄。

二 於大會諸侯，南征北伐，諸侯感德等，見齊國之非常光彩，非常榮譽，真我輩國民之師。

三 於晉楚之繼霸，見晉文若非大破楚師，則晉將讓楚以獨霸，而與諸侯服從之矣，故齊桓晉文之世，楚不能破壞和平擾亂秩序者，皆桓文武功使之然也。
參考

〔春秋之世〕春秋者，魯史記之名也，孔子修春秋，自平王之四十九年，訖敬王之三十九年，共二百四十有二年，自王室以至列邦，所有歷史，具備於是，故後世名此時代爲春秋之世。

〔尊王〕當時王室雖無權，然一般社會，祇知有君主政體，不知有民主政體，故得假尊王爲名，以便號召。

〔霸〕諸侯之長謂之霸。

〔齊桓公〕名小白，太公十一世孫，太公封齊，（都營邱，今山東昌樂縣後世徙臨淄）至桓公，霸諸侯，一匡天下，孔子稱其正而不譎，蓋頗能以公理服人，不專恃兵力，故孟子於春秋諸霸中，推桓公爲盛。

〔管仲〕名夷吾，齊襄公以無道，爲從弟無知所殺，國亂，其弟子糾奔魯，（今山東曲阜縣）小白奔莒，（今山東莒州）各謀返國，會無知亦見殺，魯以兵送子糾，而使管仲別將兵遮莒道，射中小白帶鉤，小白佯死，戰溫車中，馳行入齊，立爲桓公，桓公敗魯於乾時，（今山東博興縣）使魯殺子糾，囚獻管仲，管仲之友鮑

叔薦管仲於桓公，親迎於郊，號曰仲父，實春秋時之政治大家也。

〔大會諸侯〕會時以霸者爲盟主，計桓公時衣冠之會九，兵車之會三。

〔山戎〕卽人種學所稱東胡族也，後世之東胡及北魏北周遼金清皆屬此族，所佔地當今直隸之永平、朝陽及平泉、赤峯、建昌等州縣，桓公以山戎伐燕，故伐之。

〔楚〕楚之先出自帝顓頊，至周初有熊繹者，受封於楚，（今湖北秭歸縣爲楚最初所居地）其後漸強，桓公以楚滅諸姬，故伐之。

〔救諸侯〕救鄭（今河南新鄭縣）救燕（今直隸薊州）救衛（今河南淇縣）救邢（今直隸邢臺縣）

〔晉文公〕名重耳，成王弟叔虞之後，叔虞幼，成王戲以桐葉爲珪，曰以封汝，周公入賀，因封於唐（今山西翼城縣）後稱晉（後世徙都絳，今山西絳州）至文公，敗楚於城濮（今山東濮州）厥後世爲盟主，凡百餘年。

〔晉楚之爭〕楚至莊王敗晉師於泌（今河南鄭州）遂霸中原，其後共王爲晉敗

失霸，靈王復霸，旋內亂，又失霸。

第七 越王句踐

本文

春秋之季，吳國漸強，與晉楚鼎足而立，時楚平王殺伍子胥父兄，子胥奔

吳，率吳師伐楚，入其都，平王已死，子胥掘其墓，鞭平王之尸，楚大夫申包胥乞師於秦，吳兵始退。吳又攻越，越王句踐者，夏禹之後也，力不能敵，請臣於吳，爲吳王養馬三年，乃得歸越，句踐於是修內政，整軍備，嘗膽臥薪，誓復國仇，而事吳王益恭，使之不疑。吳王信讒，殺伍子胥，越王教養其民，已二十年，遂大舉攻吳，殺吳王，滅吳國，北會諸侯，繼晉而爲霸者。

準備

一 設問：家屬爲人陷害，是爲家仇，全國受人欺侮，是爲國仇，二仇孰大，曰：國仇大。

二 今爲汝曹言一報家仇之豪傑，因書伍子胥三字於黑版。

三 更言一報國仇之大豪傑，因書越王句踐四字於黑版，字體較前須加大。

教授事項

(甲) 時間分配 本課以一時授完

(乙) 內容提示

- 一 於楚平王一方、見君主專制之害、不容再見於中國、
- 二 於申包胥一方、見其與子胥反對處、正其能以國家爲前提處、不以友誼忘公義、是爲識輕重丈夫、
- 三 於越王句踐之種種設備、見其智深勇沉、非鹵莽之夫可比、

參考

〔吳〕古公亶父子泰伯之後、國於吳、(今江蘇吳縣)至壽夢始大稱王、至闔廬夫差而霸、

〔鼎足〕鼎三足、故凡言三項並立者、曰鼎足、

〔伍子胥〕名員、父曰奢、兄曰尚、奢爲佞臣、費無忌所構、楚平王囚之以召二子、尚赴召、與其父同見殺、子胥走、度昭關、幾不得脫、卒入吳、佐闔廬、竟復仇之志、

〔申包胥〕子胥之友、子胥之亡也、謂之曰、我必覆楚、包胥曰、子能覆之、我必能復之、及楚覆、包胥求救於秦、秦不許、立秦廷七晝夜、哭不絕、秦爲起兵、

〔越王句踐〕夏王少康封其少子於越、(今浙江紹興縣)至句踐與吳戰於夫椒、(今江蘇吳縣太湖內之洞庭西山)大敗、求成、十年生聚、十年教訓、卒滅吳、

〔整軍備〕句踐伐吳時、有習流二千、(習於水戰之士二千人)教士四萬人、(常教練之兵也)君子六千人、(有志行者)諸御千人、(理事之官在軍有職掌者)皆先時所整備也、

〔臥薪嘗膽〕藉薪而臥、寢不安也、懸膽而嘗、食不甘也、極言復仇之焦慮、

〔吳王殺子胥〕子胥爲越事、數諫夫差、太宰嚭得越之美女寶器、數與子胥爭越議、因構子胥於夫差、賜劍令自殺、子胥報使者曰、必置吾眼吳東門、觀越兵入也、後三年、越果入吳、

第八 孔子

本文 孔子名丘、字仲尼、魯(周公子孫封於魯在今山東)人也、幼孤、家貧、年十

五而志於學、博學多能、人爭師之、相魯三月、魯國大治、齊人懼魯之霸、歸女樂以沮之、孔子遂去魯、周遊列國、所至皆不合、乃歸魯、著書以教後世、年七十三而卒、後世尊爲聖人、孔子學而不厭、誨人不倦、其教人以恕爲要、曰、己所不欲、勿施於人、其論治、以大同爲極、則曰、天下爲公、選賢與能、又曰、貨惡其棄於地也、不必藏於己、力惡其不出於身也、不必爲己、孔子弟子三千人、顏回曾參爲最賢、顏子好學、不遷怒、不貳過、曾子以孝稱、能傳孔子之道、

孔子像



準備

- 一 書中孔子像、係唐吳道子所畫而刻之石者、
 - 二 問春秋時代、我國曾有一歷史發現、汝曹知此歷史何名、著自何人、答史名春秋、著自孔子、(見第六課參考內春秋之世條)
 - 三 汝曹現在本校、同學若干人、答若干人、然則有一同學最衆、非本校舍所能容、而此校亦發現於春秋時代之中國、汝曹倘亦樂聞之乎、
- 教授事項

(甲) 時間分配 本課分二時、

第一時 孔子名丘至後世尊爲聖人

第二時 孔子學而不厭至能傳孔子之道

(乙) 內容提示

- 一 孔子惟志學、故能博學、能治國、能著書、能使後世尊爲聖人、足見人不可無學、尤不可無志、
- 二 恕字爲處世大道、故愛自由者、必不侵犯他人之自由、乃爲真自由、

三 大同二字、在現時之中華民國、推選大總統、推選議院議員、方在萌芽之始、至於力出於身、貨出於地、還賴全體國民、共同盡力、學生乃國民之一分子、不可不自勉、不可不懸大同以爲前途之目的、

參考

〔孔子〕生魯昌平鄉陬邑、(在今山東曲阜縣東南)商湯之裔、父名叔梁紇、娶顏氏女名徵在、禱於尼丘、(山名距陬邑十里)生孔子、故名丘而字仲尼、三歲而叔梁紇死、

〔魯〕周公之子伯禽所封、(地詳第六課參考內管仲條)

〔博學〕問禮於老子、學琴於師襄、問官於鄭子、又項橐年七歲、以事理窮難孔子、孔子亦師之、

〔相魯〕孔子爲魯司寇、(掌刑之官)攝行相事、三月嚮羔豚者弗飾、(商業道德)男女行者別於塗、塗不拾遺、(社會道德)

〔女樂〕齊人欲沮孔子、選國中女子好者八十人、皆衣文衣而舞康樂、(舞曲名)

以遺魯君、魯君爲周道游、(徧道游行)往觀終日、凡三日不聽政、孔子遂行、

〔周游列國〕凡歷十五國、說七十二君、卒無所遇、

〔著書〕除作春秋外、又修詩、(歌詩也)書、(紀政事春秋以前之歷史也)訂禮、(禮法也)樂、(音樂也)贊周易、(易爲卜筮之書言吉凶是非之理由文王周公所著孔子作十翼以發明之蓋哲學之一種)傳孝經、(教孝之書倫理學之一種)

〔聖〕通明也、漢歷史家司馬遷贊孔子爲至聖、言至通極明之人也、

〔恕〕如心爲恕、言推己之心、以及人之心也、

〔大同〕同猶和也、平也、言大和太平之世界也、對小康言、

〔天下爲公一句〕公對私言、君主私天下爲己有、此小康時代事、大同時代則公之、選賢與能、猶現在民國、國民有選舉及被選舉爲總統及議員之權也、

〔又曰以下四句〕物之可以易財者、通謂之貨、惡其棄於地、如農林礦產等皆是、不必藏於己、言民產之大同也、力、能力也、兼智勇言、出於身不必爲己、言民德

之大同也、

〔賢〕有德之稱、

〔顏回〕字子淵、魯人、

〔曾參〕字子輿、南武城人、(在今山東費縣西南)

〔不遷怒〕一句、怒於甲者、不移於乙、過於前者、不復於後、

〔孝〕善事父母爲孝、曾參事父、能養其志、故以孝稱、孔子以孝經傳之、

第九 老子

本文 老子年長於孔子、姓李名耳、周守藏室之史也、孔子適周、問禮於老子、老子曰、吾聞之、良賈深藏若虛、君子盛德、容貌若愚、去子之驕氣與多欲、慙色與淫志、是皆無益於子之身、吾所以告子、若是而已、老子之道、貴清淨無爲、以謙下待人、嘗著書、言道德之意、凡五千餘言、世稱爲道德經、居周久之、見周之衰、遂去、不知所終、後世謂老子與其徒西遊、過流沙、傳教西域、化導胡人、又以老子修道養壽、凡神仙方術之說、悉託於老子、因奉老子爲道教之祖、

準備

- 一 寫孔子問禮於老子圖畫於黑板、隨講如下、〔問禮圖解〕執雉者孔子、拄曲足杖者老子、車爲老子車、車中坐者、爲御車僕夫、此圖出漢武氏石室畫像、與前夏桀乘人圖同、
- 二 畫雉於黑板、或即動物圖中之雉、懸示學生、
- 三 問此與本書圖內孔子手中所執、同名爲雉、汝曹知執此何爲、
- 四 告以此爲謁見時之禮物、凡人交際不可無禮、今試與汝曹言孔子所從問禮之老子、

孔子問禮於老子圖



教授事項

- (甲) 時間分配 本課以一時授完、
- (乙) 內容提示
- 一 清淨以養心、謙下以處世、對人對己兩方面、均當奉以爲師、
 - 二 神仙之說、託於老子、足見老子實爲吾國道德家、非神仙家、後人迷信神仙、因而迷信老子爲神仙之領袖者、甚屬無謂、

參考

〔老子〕楚苦縣(今河南鹿邑縣)人也、字伯陽、壽百六十餘歲、

〔守藏室史〕藏室、藏書室也、老子爲典守之史、

〔態色淫志〕態色、姿態之容色也、卽驕氣所發現、淫志、淫佚之志也、卽多欲所發現、

〔道德經〕老子乘青牛過函谷關、(今河南靈寶縣南)關令史喜曰、子將隱矣、強爲我著書、乃說道德二篇、(自然之謂道、有得於心之謂德、其理玄妙、歷史課

中可無庸深說

〔西游說〕流沙、今甘肅安西州及新疆一帶沙漠、西域、今中國新疆及蔥嶺以西、與印度地方、胡人泛稱之詞、猶今言外國人也、老子傳教西方、是爲西方各種族、與中國文明相接觸之初步、

〔神仙方術〕懸擬一靈界於人間世之外、謂之神仙、以求神仙故、有服餌符籙等之流傳、謂之方術、皆自貪戀長生一念所發生、老子旣以道德著聞於世、又西游不知所終、故後人託以爲名、號爲道教之祖、

第十 戰國七雄

本文


春秋以後、諸侯競爭愈烈、爭城爭地、殺人無算、謂之戰國之世、凡七國、在西者爲秦、在東者爲齊、在北者爲燕、在南者爲楚、韓趙魏三國、在其中央、是爲戰國七雄、韓趙魏者、晉之大夫也、戰國之初、分晉而有其國、號曰三晉、西與秦爲鄰、秦孝公任商鞅爲相、大變舊法、獎農業、勵武功、太子犯法、刑其師傅、國人莫敢不守法、秦遂富強、起師攻三晉、奪其地、於是六國皆畏秦、蘇秦張儀

者、師於鬼谷子、游說諸侯、蘇秦勸六國抗秦、張儀勸六國事秦、諸侯反覆無常、不能始終連合、相繼爲秦所滅、

準備

一 繪戰國疆域圖於黑板、隨講明如下、〔戰國疆域圖解〕濱海爲齊、其北爲燕、燕西爲趙、趙南爲魏爲韓、韓以南爲楚、均在秦之函谷關以東、故史稱關東六國、周小而弱、不足與於

戰國疆域圖



六國之列、六國之西爲秦、以其在函谷關內、故稱秦爲關中、咸陽其都城也、二 設問家庭之內、兄弟弟、以和好爲宜乎、抑否乎、必曰和好、三 一國猶一家也、一國國民、猶之一家兄弟、以統一爲宜乎、抑否乎、必曰統一、四 然則爲汝曹言中國不統一時代之害、及其時全國同胞兄弟之苦、

教授事項

(甲) 時間分配 本課分二時、

第一時 春秋以後至於是六國皆畏秦

第二時 蘇秦張儀者至相繼爲秦所滅

(乙) 內容提示

一 爭城爭地、殺人無算、以同胞殺同胞、卽與自殺無異、故統一爲國家莫大之幸福、

二 尊重實業、尊重軍人、此商鞅富強秦國之本、而尤要在尊重法律、蓋必能尊重法律、然後人不得爲法外之自由、而舉國受法律之保護、

三 諸侯以聯合不堅，爲秦所滅，可見非合羣不能禦侮，羣以內苟起無謂之競爭，羣以外必受莫大之禍患。

參考

〔戰國之世〕自春秋之後，訖於秦之混一，此時代戰爭之烈，爲前古所無，統稱爲戰國之世。蘇秦言：「凡天下戰國七，詳見下。」

〔秦〕秦之先出自帝顓頊，洪伯益佐舜有功，賜姓嬴氏。至周孝王時，非子封秦，（今陝西秦州）平王東遷，以西周地畀秦襄公，戰國時擴地益大，奄有今陝西甘肅四川及河南之西境。

〔齊〕戰國時田和代姜氏有國，田氏之先出自帝舜，至田和爲齊太公，奄有今山東及直隸之南境。

〔楚〕戰國時併有吳越之地，奄有今湖北湖南江蘇安徽浙江江西及廣西之北境。

〔燕〕周同姓召公奭之後，奄有今直隸及山西之北境，奉天之西境。

〔趙〕與秦同祖，至周穆王時，造父受封於趙城，（今山西趙城縣）由此爲趙氏，至趙襄佐晉文公爲霸主，遂世爲晉卿，至趙籍與韓魏分晉，是爲趙烈侯，其領域當今之山西及直隸之西南境。

〔韓〕韓之先與周同姓，見滅於晉，其後裔事晉，得封於韓原，（即故韓國今陝西韓城縣）曰韓武子，子孫世爲晉卿，從封地爲韓氏，至韓虔與趙魏分晉，是爲韓景侯，其領域當今河南之西南部。

〔魏〕魏之先亦與周同姓，晉獻公時，畢萬受封於魏，（今山西芮城縣）子孫從封地爲魏氏，世爲晉卿，至魏斯與韓趙分晉，是爲魏文侯，其領域當今河南之東北及山西西南境，陝西北境之地。

〔七雄〕強有力之謂雄，七國勢均力敵，各不相下，故曰七雄。班固文：「七雄號鬪，言秦及六國也。」

〔三晉〕韓魏趙本晉卿，戰國時號三晉，秦孝公述其先世，言外事三晉。

〔秦孝公〕名渠梁，卽位時年二十一，憤秦僻在雍州，不得與中國諸侯之會盟，夷

狄遇之、乃布惠振孤寡、招戰士、明功賞、下令國中、賓客羣臣、有能出奇計彊秦者、尊官分土、得商鞅任之、遂爲秦混一中國之基礎、

〔商鞅〕衛人、少好刑名之學、魏相公叔痤薦之、魏惠王不能用、聞秦孝公求賢、乃西之秦、佐孝公、成彊秦之業、

〔大變舊法〕變法令既具、未布、鞅恐民不信、乃立三丈之木於都市南門、募有能徙置北門者、予十金、民怪之、莫敢徙、復曰、予五十金、有一人徙之、輒予五十金、以明不欺、於是下令、令行於民、道不拾遺、山無盜賊、家給人足、人勇於公戰、怯於私鬪、

〔獎農業〕鞅之令、大小僇力本業、耕織致粟帛多者、復其身、（免其力役以獎之）

〔勵武功〕鞅之令、有軍功者、各以率受上爵、宗室非有軍功、論不得爲屬籍、（言若無軍功、不得入宗室之籍、受爵秩也）

〔刑太子師傅〕太子犯法、鞅曰、法之不行、自上犯之、將法太子、太子君嗣也、不可施刑、刑其傅公子虔、黥其師公孫賈、秦人皆趨令、

〔攻三晉〕鞅擊魏、虜魏公子卬、鞅之後、秦與三晉屢開戰、拓地日廣、

〔蘇秦〕東周雒陽（今河南洛陽縣）人、字季子、曾說秦惠王兼并天下、不用、遂如燕、說以合縱之術、（南北爲縱、連合六國併南北之力、以西向抗秦、謂之合縱）燕王大說、厚賜蘇秦、使說韓魏趙齊楚、約成、蘇秦佩六國相印、

〔張儀〕魏人、嘗從楚相飲、楚相亡璧、門下意張儀盜之、笞儀數百、儀歸、其妻誡無讀書游說、儀謂之曰、視吾舌在否、妻笑曰、舌在也、曰足矣、後入秦、爲秦間齊楚之交、且說以連橫之利、（東西爲橫、連合六國以事秦、則東西相一、故曰連橫）由是遍說各國、連橫之局以成、

〔鬼谷子〕縱橫家之祖、後世謂鬼谷子姓王名詡、潁川陽城（今河南登封縣東南）有鬼谷、詡之所居、故號鬼谷子、

〔諸侯見滅〕六國各爭私利、罔守公約、秦以其間宰割之、韓以秦始皇十七年亡、趙以十九年亡、趙公子嘉奔代、（今直隸蔚州）立國爲代王、魏以二十二年亡、楚以二十四年亡、燕以二十五年亡、代亦亡、齊以二十六年亡、

第十一 孟子

本文 孟子名軻，字子輿，鄒（在山東）人也。少時，其母三遷其居，舍於學宮之旁，使知禮儀。孟子嘗廢學，孟母斷織以警之。孟子懼，勤學不怠，遂成大儒。孟子學既成，欲行孔子之道。時戰國君臣上下，競尚功利，孟子周遊列國，以養民之政，告其君主，當時無用其言者，乃退與弟子講學論道，著孟子七篇，傳於後世。孟子好言仁義，尤重民權，嘗曰：民爲貴，君爲輕，湯放桀，武王伐紂，孟子謂之誅一夫，其論用人也，曰：國人皆曰賢，然後用之，國人皆曰不可，然後去之。

準備

- 一 懸示孟子肖像，或大書孟子二字於黑板。
- 二 現在中華民國之政體，採自西人，然我國數千年前，即有發明此種理由之賢人出現，其人爲誰？（即指肖像或指黑板所書之孟子二字示之以振其精神）

教授事項

（甲）時間分配 本課以一時授完。

（乙）內容提示

- 一 於孟母之教子，見家庭教育之不可缺少，爲人子者，尤當竭誠意以承受之，乃能獲益。
- 二 於民貴君輕，見爲國家之主人者，乃全體國民，學生求學，務以完成國民資格爲目的。
- 三 於國人皆曰賢，皆曰不可，見國民有監督政府之義務，爲學生時，即須豫備學識，以便將來分別是非之用。

參考

「孟子」受業於子思之門人，子思，孔子之孫也，孟子蓋卽孔子之大同學說而光大之，爲中國民權發明家。

「鄒」今山東鄒縣。

「孟母三遷」孟子之母，其舍近墓，孟子之少也，嬉戲爲墓間之事，踴躍築埋，孟母

曰、此非所以居子也、乃去舍市、其嬉戲爲賈術、(行賣之謂術)孟母曰、此非以居子也、乃徙居學宮之旁、其嬉戲乃設俎豆、揖讓進退、孟母曰、此真可以居子矣、遂居之、

〔斷機〕孟子少時誦、其母方織、孟子輟然中止、其母引刃裂其織、以此誡之、

〔周游列國〕孟子至齊、齊宣王不能用、適梁、梁惠王不果所言、

〔養民之政〕重農桑以養民生、設學校以養民德、皆孟子所主張、

〔弟子〕萬章、公孫丑、樂正克之類、

〔仁義〕仁者心之德、義者事之宜、

〔民權〕國爲國民所共有、卽應享有國民之權、謂之民權、現時中華民國人民、享
有法律內之種種自由權、除違犯法律外、不得將其權剝喪、卽是之謂也、孟子
貴民、雖未明言民權、其理已表明矣、

〔一夫〕孟子言賊仁者謂之賊、賊義者謂之殘、殘賊之人、謂之一夫、一夫猶言獨
夫也、蓋人在國中、同受仁義之保障、乃能合羣、言一夫者、聲明其自棄於一羣

之外、一國之外也、故其罪當誅、

〔國人皆曰四句〕皆、猶言大多數也、現在我國、以大多數人民之同意、選舉議員
爲代表、復以大多數議員之同意、選舉總統、與孟子所言相脗合、

第十二 秦始皇

本文

秦孝公、定都咸陽、(在陝西)數傳至莊襄王、遂滅周、子政卽位、滅六國、建
號皇帝、是爲秦始皇、時在民國紀元前二千一百三十二年、自此以後、君位益尊、
君權益重、始皇廢封建、立郡縣、北逐匈奴、收河南之地、(在內蒙古西部)築萬
里長城、以防北邊、南取南越、(今兩廣安南)威名遠播於外國、外人稱中國曰支
那、卽秦之轉訛也、始皇務行專制之政、焚詩書、坑儒生、收民間兵器、以爲金人、
徙海內豪傑、使居咸陽、建阿房宮、工作者七十餘萬人、巡遊四方、以明得意、方巡
遊之際、韓人張良、以鐵椎狙擊始皇、不中、中副車、始皇大驚、

準備

一 問孟子之政治主義、與近今相合者何在、答在重民權、

二 由孟子之說行之、我國民權、必早發達、不幸於戰國之季、有一大魔障出現、剝削民權、使我政治界暗然無光彩者、二千有餘年、汝曹欲知此魔障之主名乎、

三 因大書秦始皇三字於黑板、指示之曰、魔障在是、魔障在是、

教授事項

(甲) 時間分配 本課分二時、

第一時 秦孝公定都咸陽至卽秦之轉訛也

第二時 始皇務行專制之政至始皇大驚

(乙) 內容提示

一 君位益尊、則民位益卑、君權益重、則民權益輕、當時國民之苦可知、我輩幸生民國、爲民國之主人翁、無君位君權之束縛、何等愉快、當如何自尊自重、養成人格、以爲此愉快之代價、

二 以始皇之雄鷲、不免爲張良所狙擊、足見專制之大非天理、大悖人情、

參考

〔秦孝公定都咸陽〕秦初由甘肅秦州徙陝西隴州、其後德公徙都雍、(今陝西鳳翔縣) 至孝公又徙都咸陽、(今陝西咸寧縣東)

〔莊襄王滅周〕孝公既歿、歷惠文王、武王、昭襄王、至莊襄王、周赧王之五十九年、西周君 (非周初之西周也) 周考王封其弟揭於河南以續周公之職、是爲西周桓公、都王城地在今河南靈寶縣東南、獻地於昭襄王、赧王旋卒、後七年爲莊襄王元年、東周君 (非東遷時所稱之東周也) 西周桓公之孫惠公封其少子於鞏、是爲東周惠公、鞏在今河南鞏縣西南、亦見遷、於是周全亡、

〔秦始皇滅六國〕始皇使內史勝滅韓、王翦滅趙、滅楚、王賁滅魏、滅燕、滅齊、遂一天下、

〔建號〕始皇令羣臣議稱號、羣臣以古有天皇、地皇、泰皇、(均在伏羲前) 泰皇最貴、請號泰皇、始皇自以功過三皇、德過五帝、號曰皇帝、又曰朕爲始皇帝、後世以計數、二世三世、至於萬世、傳之無窮、

〔廢封建〕太古時代，各部落各戴其酋長，有帝王起，因而封之，是爲諸侯。周初，除原有之諸侯外，又封古代聖人之後，封同姓及功臣，是爲封建。然春秋戰國，皆以諸侯侵天子之權，互相攻伐，馴致夷滅，秦懲其弊，故廢之。

〔立郡縣〕時有創封建之議者，李斯言：周封子弟，同姓甚衆，然後屬疏遠，相攻擊如仇讐。天子弗能禁，今海內賴陛下神靈，一統皆爲郡縣，易於控制。於是分天下爲三十六郡，郡置守，掌民政；置尉，掌兵政，而以監監督之。郡置縣，各若干，縣萬戶以上置令，減萬戶置長，均直隸於中央政府，與封建之各君其國，各子其民異。

〔北逐匈奴〕匈奴於人種學內，屬土耳其族。始皇巡北邊，遣將軍蒙恬，發兵三十萬人北伐，斥逐匈奴。

〔河南地〕今爲內蒙古鄂爾多斯地，地名河套，爲黃河所灌注，土脈肥美。始皇收入版圖，爲四十四縣。

〔長城〕長城起臨洮（今甘肅洮州）至遼東（今奉天東南境及朝鮮西北境），延

袤（延長也）南北曰袤，號萬餘里，爲中國大工程之一。然非今之長城，今之長城，乃漢以來遺跡，而明人修築之者也。

〔支那〕始皇統一海內，餘威遠震，附近之民族，因呼之爲秦，後轉訛而爲支那。初見於譯譯之佛書，今則外國以此爲我國之名稱，然名從主人，故通稱仍以中國及中華爲準。

〔南越〕一稱百越，始皇略取其地，置桂林（今廣西東大半地）南海（地當今廣東全部十之九）象郡（今廣西小半廣東西南部及安南之東京）。

〔專制〕君權無限，以意旨爲法令，謂之專制。

〔焚詩書〕李斯言：天下已定，法令出一，諸生不師今而學古，聞令下，則各以所學議之，請令天下有藏詩書百家語者，皆詣守尉雜燒之，是爲我國學術史之一大厄。

〔坑儒生〕時諸生相與譏議始皇，始皇大怒，使御史案問，捕得四百六十餘人，皆坑之。

〔收兵器爲金人〕共鑄金人十二、重各千石、置宮廷中、

〔阿房宮〕以形名、言其四阿旁廣也、始皇以先王宮廷小、乃造此宮、迤邐蓋三百餘里、後人謂蜀山厄、阿房出、川省開闢未久、森林最富、故採蜀山之材以建宮也、此亦當時中國大工程之一、惜不久即爲項羽所焚、化爲焦土、

〔巡游四方以明得意〕始皇以二十八年東巡、封泰山、（積土爲封而祭之泰山、在今山東泰安府）禪梁父、（除地爲壇而祭之梁父、在今山東新泰縣西）遂游海上、南渡江、厥後頻年出游、所至多刻石頌功德、

〔張良狙擊〕張良世爲韓人、以韓滅於始皇、爲國報仇、始皇以二十九年東游、至陽武（今河南陽武縣）博浪沙中（縣東南）良令力士操鐵錐狙（伏伺也）擊始皇、誤中副車（隨從之車又名屬車）始皇令天下大索十日、卒弗得、良後佐漢、以功封留（在今江蘇沛縣東南）侯、

第十三 漢高祖

本文

始皇卒、子胡亥立、刑罰苛暴、殺戮任意、趙高爲相、專權、胡亥信之、人民怨

苦、爭欲起而亡秦、陳勝吳廣同舉兵、四方豪傑響應、項羽起兵於吳、率子弟八千人、渡江而西、大敗秦兵、劉邦起兵於沛（今江蘇沛縣）引軍進攻秦、時胡亥爲趙高所殺、立其姪子嬰爲秦王、子嬰降於劉邦、專制之威、以秦爲最、然僅十五年而亡、秦既滅亡、項羽稱西楚霸王、以劉邦爲漢王、二人爭權、相攻不已、項羽兵敗自殺、劉邦遂稱帝、都長安（今陝西省治）是爲漢高祖、平民爲帝由此始、蓋古代皆貴族專政、平民無權、故革命之事、概出於貴族、如商湯周武是也、秦廢封建、貴族無權、自是以後、天子無道、則人民誅之而代其位矣、

準備

- 一 問始皇對於帝位之意見如何（見第十二課參考內建號條）曰欲二世三世、至千萬世、傳之無窮、
- 二 然則汝曹試核其擅有帝位之世數、因寫其帝系於黑板、如下、（秦始皇帝政——二世皇帝胡亥——秦王子嬰）
- 三 汝曹試以算術計之、居始皇原擬千萬分之幾、答千萬分之三、

四 汝曹試再諦視之，二世以下，已係王號，非帝號矣，然則當居千萬分之幾，曰千萬分之二。

教授事項

(甲) 時間分配 本課分二時

第一時 始皇卒至然僅十五年而亡

第二時 秦既滅亡至則人民誅之而代其位矣

(乙) 內容提示

- 一 人民怨苦，爭欲亡秦，以政府變而為怨府，其故安在，曰在專制。
- 二 始皇欲萬世，而實止十五年，望奢而效薄，其故安在，曰在專制。
- 三 商湯周武，皆有土有民為根據，故夏殷見滅，漢高無尺土一民，義旗一舉，秦亦隨亡，其故安在，曰在專制。
- 四 天子無道，人民誅之而代其位，此位實為萬惡之本，何以故，以其便於專制，故我輩幸生民國，當使專制永不再見於中華。

參考

〔胡亥〕始皇少子，始皇以三十七年東游，至平原津（今山東平原縣境）而病，長子扶蘇性仁慈，以諫阻阮儒事，命監蒙恬軍於上郡（今山西膚施縣），始皇病益甚，乃為璽書，令扶蘇與喪，會咸陽而葬，書未發而始皇道卒，胡亥從在道，趙高故教胡亥書及獄律，令法事，時為中車府令，行符璽事，因祕始皇喪，與胡亥及丞相李斯陰謀，矯始皇書，賜扶蘇及蒙恬死，立胡亥為太子，胡亥至咸陽始發喪，襲位為二世皇帝。

〔刑罰苛暴二句〕秦自商鞅造參夷之誅（參夷夷三族）增加肉刑，至始皇專任刑罰，赭衣塞路，圜牆成市，胡亥又聽趙高言，更為法律，益務刻深，宗室子女，多被慘戮，相連逮者，不可勝數，李斯亦赤族。

〔趙高專權〕趙高既族李斯，代為丞相，欲為亂，恐羣臣不聽，乃先設驗，持鹿獻於胡亥，曰：「馬也。」胡亥笑曰：「丞相誤耶，謂鹿為馬，問左右，或默，或言馬，以阿順趙高，或言鹿，高因陰中諸言鹿者以法，後羣臣皆畏高。」

〔陳勝吳廣〕勝廣均爲屯長，率役徒戍漁陽（今直隸密雲縣）。天雨失期，法當斬，勝廣激其衆曰：公等皆失期，失期當斬，假令無斬，戍死者固什六七，壯士不死則已，死即舉大名耳，王侯將相寧有種乎？衆皆從之，乃起兵於蕪（今安徽宿縣南）。時二世元年也。勝廣雖前後爲其下所殺，然遂爲亡秦時代之最先動機云。

〔項羽〕下相（今江蘇宿遷縣）人，其先世世爲楚將。季父梁嘗教羽以兵法，羽長八尺，力能扛鼎，才器過人。會陳勝起，梁因使羽擊殺會稽（治今江蘇吳縣）守起兵，梁轉戰至定陶（今山東定陶縣西北），爲秦將章邯敗死。羽引兵大破章邯軍，西行入秦。

〔劉邦〕沛人，亡命匿芒碭山（在今江蘇碭山縣東）中。會沛令抗秦，召諸亡在外者，劉邦衆已數十百人，令悔閉城。沛父老率子弟殺令迎邦，立以爲沛公。聚子弟得三千人，轉戰而西。

〔子嬰〕胡亥之兄子，胡亥以劉邦已破武關（今河南鄧州西），使人責趙高、高懼，令其壻咸陽令閻樂數胡亥罪，迫令自殺。高以秦故王國，始皇君天下，故稱帝。

今六國復立，宜爲王如故，乃立子嬰爲秦王。令子嬰齋，廟見受璽，齋五日，高使人請子嬰，子嬰稱病不行，高自往請，子嬰遂刺殺高族之。

〔子嬰降劉邦〕劉邦軍至霸上（今陝西咸寧縣東），子嬰素車白馬，係頸以組，（示將自殺意）降軹道（亭名在今咸陽縣東北）旁，旋爲項羽所殺。

〔十五年〕始皇以二十六年混一中國，稱皇帝，閱十二年卒，子胡亥爲二世皇帝，三年見殺，兄子子嬰降稱王，在位僅四十六日。

〔劉項之爭〕項羽入關，分王諸將，立劉邦爲漢王，都南鄭（今陝西南鄭縣），自爲西楚霸王，都彭城（今江蘇銅山縣）。邦以韓信爲大將，還取關中，計與羽劇戰。凡四年，追羽至垓下（在今安徽靈璧縣東南），圍之數重，羽潰圍出，至烏江（在今安徽和州）自刺死。


〔漢高祖〕劉邦既擊滅項羽，因秦舊稱，稱皇帝，以漢爲有天下之號，其嗣皇尊之爲太祖，諡爲高，在位八年，傳十二帝，二百十年。

第十四 漢武帝

本文

漢高祖之後、數傳而至武帝、好文學、尊崇孔子、任用儒生、然其最著者為武功、後世與秦始皇并稱、謂之秦皇漢武、即漢族之名稱、亦因此而起也、是時與漢對峙者為匈奴、秦之亡也、匈奴復入河南之地、據內外蒙古、時侵漢邊、武帝命衛青霍去病為將、逐匈奴、收回河南之地、於是西通西域、南定南越、閩越（今福建）東平朝鮮、漢土日以廣大、秦始皇好神仙、武帝亦然、屢為方士所欺而不悟、

漢 兵 攻 戰 圖



漢 國 界 圖

又大營宮室、巡遊四方、亦與始皇無異、財用不足、則重賦稅、賣官爵、人民苦之、此

其失也、

準備

- 一 寫漢兵攻戰圖五字、並畫漢疆域略圖於黑板、隨講如下、〔漢兵攻戰圖解〕
圖出漢武氏石室畫像、圖中作闌干式者、畫時之界線也、界線以上爲車徒騎
三種兵、界線以下爲舟師、〔漢疆域圖解〕長安爲漢都、其北爲河南地、河南地
以南、東西迤之城堞、乃明代修築之長城、非秦舊也、其北爲匈奴、其西爲西域、
就中葱嶺、爲全亞山脈所發生之總匯、長安之東南爲閩越、閩越之西南爲南
越、均濱海要地、至於東北部分之朝鮮、本爲中國人所建國、漢武更取之以入
中國之版圖焉、
- 二 問人各有短長、秦始皇所短在專制、其長處汝曹知之乎、（有能答者則與
以語言之獎勵、否則正告之如下）
- 三 始皇北逐匈奴、收河南之地、南取南越、威名遠播於外國、皆始皇之所長也、
故始皇所短在專制、所長在武功、今爲汝曹述與始皇齊名之漢武、

教授事項

（甲）時間分配 本課分二時、

第一時 漢高祖之後至漢土日以廣大

第二時 秦始皇好神仙至此其失也

（乙）內容提示

一 武功爲立國要素、我輩生當今日、當思秦皇漢武之國威、人人當有愛國之
熱忱、即人人當有尙武之精神、

二 西域及蒙古一帶、自漢時已入我國版圖、我輩當以熱心毅力、使之聯合鞏
固、庶不負古人經營之勞、

三 奢華爲致貧之原因、凡我國民、均當以節用爲富國之基礎、不當專責備於
政府、

參考

〔武帝〕名徹、高祖之曾孫、高祖卒、子惠帝盈立、惠帝卒、母呂后稱制、呂后卒、高祖

子文帝恆立、文帝卒、子景帝啟立、景帝卒、子武帝徹立、武帝在位五十四年、
「好文學」帝招選天下文學材智之士、拔其俊異者寵用之、司馬相如、東方朔、枚
皋等、皆文學大家、並在左右、

「尊崇孔子」孔子爲儒家之祖、帝雅嚮儒術、故尊崇之、

「任用儒生」帝舉賢良、得董仲舒、用其言抑黜百家、表章六經、趙綰王臧公孫弘
之屬、皆以儒生大用、惟百家各有發明、自崇儒後一律罷黜、實爲中國學術史
上之一大厄、

「漢族名稱之由來」帝揚威四夷、名震絕域、故異國之對於中邦、遂以朝名名我
族、迄今二千餘年、尙沿用之、

「秦亡後之匈奴」匈奴之先、相傳爲夏后氏之苗裔、與漢族原係一家、殷時始奔
北邊、其俗善騎射、長畜牧、逐水草而居、無城郭、習戰攻以征伐、是其天性、秦始
皇時北徙十餘年、不敢犯中國、至秦亂復稍渡河、與中國界於故塞、

「內蒙古」以大沙漠爲天然界線、內蒙古在沙漠以南、漢時稱爲漠南、外蒙古

在沙漠以北、漢時稱爲漠北、皆匈奴所領、

「侵邊」匈奴自冒頓（音墨特）寢強、曾圍高祖於平城（今山西大同縣東）遣呂
后嫚（侮辱之也）書、與定和親約無效、歷文景及武帝之時、其種人數入邊爲
寇、殺略人民、

「衛青」武帝后衛子夫之弟、帝命將兵擊匈奴有功、官至大將軍、

「霍去病」衛青姊子、數從青北伐有功、爲驃騎將軍、帝命青與去病各將五萬騎
擊匈奴、青出定襄（治今山西歸綏縣南）去病出代郡（治今直隸蔚州）去病
渡沙漠、大破匈奴、封狼居胥山（在今外蒙古車臣汗境）而還、單于（匈奴酋
長名號）遠遁、漠南無王庭、帝特置大司馬位、位青去病兩人、

「收河南地」以其地置朔方（今內蒙古鄂爾多斯）五原（今內蒙古烏喇忒）兩
郡、

「西通西域」詳後課、

「南定南越」南越王趙佗、於秦時爲龍川（今廣東龍川縣）令、行南海尉事、秦漢

問自立、擊併桂林象郡（注詳第十二課參考內南越條）漢高祖已定天下、遣使立爲南越王、武帝時、佗玄孫興嗣立、將與太后入朝於漢、爲其相呂嘉所殺、立興兄子建德爲王、帝遣將擊斬建德及呂嘉、

〔閩越〕閩越王無諸、本越王勾踐之後、秦并天下、廢爲君長、秦亂、無諸從諸侯滅秦、又佐漢滅楚、漢高祖因復立無諸爲閩越王、後數反覆、武帝遣路博德楊僕等討滅之、

〔東平朝鮮〕朝鮮、周初箕子所封、其地當今奉天省南境、及今朝鮮之北部、漢初、燕人衛滿、襲箕準而據其地、國勢甚盛、傳至孫右渠、不服漢、漢遣楊僕荀彘等擊之、朝鮮殺右渠以降、

〔秦始皇好神仙〕始皇遣方士（方術之士）徐福、發童男女數千人入海、求蓬萊方丈瀛洲三神山、謬傳神山禽獸盡白、黃金銀爲宮闕、諸仙人及不死藥皆在焉、其後徐福求神山不返、相傳今之日本人、爲徐福童男女之後、

〔武帝求仙〕方士少翁樂大公孫卿之屬、皆以仙術被殊寵、然卒無效、至晚年、乃

罷方士候神人者、自嘆向時愚惑、爲方士所欺、曰天下豈有仙人、盡妖妄耳、

〔大營宮室〕帝初作柏梁臺、柏梁既災、聽越人勇之言、謂越俗有火災、復起屋、必以大用勝服之、乃作建章宮、度爲千門萬戶、東鳳闕、西虎圈、北太液池、中有漸臺蓬萊方丈瀛洲壺梁、南玉堂璧門、立神明臺井幹樓、輦道相屬、

〔巡遊四方〕帝嘗出長城、登單于臺（今山西歸綏縣西）又屢東巡至海上、求神仙、南巡至江漢、

〔重賦稅〕帝時初算商賈（始稅商賈車船令出算）算緡錢（各以財產所值估計報官其稅百分之二）收武關出入稅、置鹽鐵官、榷酒酤、

〔賣官爵〕帝以征伐之餘、用度不足、始立賞官、開鬻賣之門、入穀者入羊者入奴婢者入財者、皆得入仕、

第十五 張騫

本文 西域者、今之新疆省、及蔥嶺以西之地也、漢武帝欲與西域諸國連合、以夾擊匈奴、募能出使外國之人、張騫應募往、由漢至西域、必先經匈奴中、騫爲

匈奴所留得間西去、經歷大小諸國、識其地形物產、其歸也、復爲匈奴所得、又得脫、在外十三年、同行百餘人、惟偕一人還、帝封爲博望侯、其後、屢出使西域、使諸國絕匈奴與漢通、漢室之聲名愈遠、同時有蘇武者、出使匈奴、匈奴欲降之、不肯、囚之大窖中、絕其飲食、武終不降、乃徙之北海（即今西伯利亞之貝加爾湖）上、使牧羊、久之、匈奴與漢和親、始得歸、武留匈奴凡十九年、

準備

一 問中國國威之遠震、自漢武始、漢武一人之力與、抑多數愛國豪傑之力與、答多數愛國豪傑之力、

二 問對於前敵一方面、則須將才、對於外交一方面、則須使才、衛青霍去病之將才、汝曹知之矣、亦欲知當時之使才乎、

教授事項

（甲）時間分配 本課分二時、

第一時 西域者至漢室之聲名愈遠

第二時 同時有蘇武者至武留匈奴凡十九年

（乙）內容提示

一 西域一帶、經我漢代先烈、費無數心力、連合爲一、故我輩國民、對於西域一方面、務須永遠連合、鞏固我五族共和之基業、庶上對先烈而無媿、

二 無冒險進取之志者、不足任使職、觀張騫之兩次爲匈奴所得、卒能達其目的、回報國家、何等榮譽、

三 無捨生愛國之誠者、不足任使職、觀蘇武之窖中絕食、北海牧羊、十九年如一日、不負初心、何等榮譽、

參考

〔新疆省〕分天山南北二路、民國紀元前三十四年、即清光緒四年、改建行省、漢武帝時北路爲烏孫諸國、南路有城郭三十六國、〔蔥嶺以西〕蔥嶺即古之崑崙、爲天山阿爾泰山之總系、其迤西一帶、今爲俄屬之中亞細亞、

〔西域諸國〕皆在匈奴之西、烏孫之南、若婼羌、若樓蘭、若且末、若小宛、若精絕、若戎盧、若扞彌、若渠勒、（八國在敦煌以西、于闐以東、今已淪爲戈壁）若于闐、（今和闐州）若皮山、（今皮山縣）若難兜、若烏秣、（今巴達克山地）若西夜、（今莎車府南）若子合、（今葉城縣）若蒲犁、（今蒲犁廳）若依耐、（今英吉沙爾廳）若無雷、（在帕米爾地方）若大宛、（今俄屬浩罕）若桃槐、若休循、若捐毒、（皆葱嶺間小國）若莎車、（今莎車府）若疏勒、（今疏勒府）若尉頭、（今烏什廳）若姑墨、（今拜城縣）若溫宿、（今溫宿府）若龜茲、（今庫車州）若尉犁、若渠犂、若危須、若焉耆、（皆今焉耆府）若車師、（今吐魯番廳）若墨山、（在今羅布泊北）若覲、若狐胡、（皆在今鄯善縣）若烏壘、（在今輪臺縣）是爲城郭三十六國、

〔由漢至西域必先經匈奴中〕今甘肅西部、及內蒙古之阿拉善額濟納二旗、新疆之哈密鎮西諸地、武帝以前、皆爲匈奴所領、有自武帝伐匈奴、始以次收爲漢土、

〔張騫〕漢中成固、（今陝西成固縣）人、以通西域功、封博望侯、（取其能廣博瞻望也）實吾國之探險家、外交家、

〔騫爲匈奴所留〕匈奴得騫、傳致單于、單于曰、月氏（在今俄屬中亞細亞）在吾北、漢何以得往使、留騫十餘歲、予妻有子、然騫持漢節不失、居匈奴西、騫因與其屬亡嚮月氏、抵大宛、大宛爲發譯道、抵康居、（今俄屬中亞細亞境）康居傳致大月氏、歲餘東歸、復爲匈奴所得、留歲餘、單于死、國內亂、騫與胡妻及胡人堂邑（姓）父（名）還漢、

〔屢使西域〕騫又奉命使烏孫、致賜諭指、（以天子意指曉告之）分遣副使使大宛、康居、月氏、大夏、（在月氏東）烏孫發譯道送騫、與烏孫使數十人、馬數十匹、報謝、（烏孫報漢賜也）騫爲人彊力、寬大信人、外國信之、其所遣副使通大夏之屬者、皆與其國人俱來、於是西北國悉通於漢、

〔蘇武〕杜陵（今陝西咸寧縣東南）人、爲單于所留、置大窖、（舊米粟之窖而空者也）中絕不飲食、天雨雪、武臥齧雪、與旃毛并咽之、數日不死、匈奴以爲神、乃

